

— Բարի եղէք, մայրիկ ջան, եթէ կարելի է, կեղտոտ ջուրերը եւ տան աղբը բակը չթափել, առանց նրան էլ չնչէլ անկարելի է եւ առողջապահութեան համար...

Մայրիկ ջանը նախ մոթմոթում է, ջղային մատներով փեշը վեր առնում քիթը մաքրում, ներս մտնում, դուրս գալիս, մօտի երեխին խփում, վրան անարդար տեղը պոռում, յետոյ սպասում է, որ հեռանաս եւ, երբ հեռացար, ձայնը դուրսն է պցում եւ սկսում...

Հարեւանները դուրս են գալիս, նայում: Չեզոքի դիրք են բռնում: Ուրախ են, որ այս անգամ թամաշայի պատճառը իրենք չեն: Պառուր ողբերգում է: Միշտ փեշը ձեռքին, միշտ քիթը մաքրելով, կանգնում է այլեւս բակի մէջ կուտակուած ցեխի վրայ՝ միակ չոր տեղը՝ եւ պոռում: Որովհետեւ վարի յարկն են ապրում, կարծում են, որ միշտ էլ էտպէս ես ապրած: Տունից տեղից հանեցին, բաղերը չորցան, քաղաքի փողոցները պցեցին, հիմա էլ եկել մաքրութիւն են սորվեցնում: Աշխատաւոր ժողովուրդը մե՛նք ենք, մեր իրաւունքն ենք պահանջում... Օտար երկրներից ոսկիներով չենք եկած... Ղլներբիս ցիլինտը չենք դնում, վզներբիս գոմէշի կաշի չենք կապում...

Պառաւի կռացած քիթը սպառնալիքի նման օդի մէջ շարժւում է, խոպոտ ձայնը լեցնում է բակը հայհոյանքներով, ամօթալի խօսքերով, չորցած դաստակները բարձրանում են դէպի երկինք ու փեշը, պատուած առագաստի նման, ուռչում է, գլորում, վայր ընկնում ու պտոյտ գալիս վհուկի հետ միասին:

Այրպէս մի ժամ:

Այլեւս յոգնած, ամէն մարդ ներս է մըտնում:

Տեղ չկայ՝ ուր նստես: Յեխ, գարշահոտութիւն, անորոշութիւն եւ ահռելի ձանձրոյթ...

* * *

Այս տան քնակիչները աչքերի մէջ երկար նայուածքներ եմ ձգում, աշխատում հասկանալ: Բանալին կորցրած, ժանգոտած կղպանքների են նմանում, որոնք ընդմիշտ պոց են մընացել: Բանալու համար պէտք է դուռը ճեղքել, խոնաւութիւն տեսած փայտերը դատել եւ ներս մտնել մութ մի տեղ, ուր անպէտք անային առարկաներ են լքուած:

Ապրում են ժամանակաւոր կերպով, պատահական, անտէր պանդուխտ մէջ: Հինի կըցկըտուր յիշատակներ, որոնք հեռանալով, երազի թեւեր են առնում: Այս մարդիկ, կասկած չկայ, առաջ էլ ապրում էին միջակ, տաղտկալի կեանքով, բայց այսօր մշուշը այնքան թանձր է, օրը այնքան երերուն, որ անցեալի ամէն մի աննշան դէպք՝ մի մաքուր սենեակ, մի մահճակալ, մի դաշնամուր, մի վատթար պաշտօն, բանկայում ունեցած մի քանի հարիւր բուբլի՝ երեւակայութեան մէջ կորցրած մեծ գանձի հանգամանք են առնում:

Ներկայի դէմ չարանում են, վախենում: Վստահ չեն: Սպասում են: Ի՞նչ են սպասում, իրենք էլ լաւ չգիտեն: Ի՞նչ էլ լինի, միայն թող փոխուի, թող փոխուի...

Մէկ մէկի նախանձում են: Ամէն մէկը դիմացինի դէմ իր փոքրիկ իժը ունի պահած: Ծոցի մէջ, մարմնի տաքութեան մօտ, պահում են, կերակրում, փայփայում: Օրը մի քանի անգամ իժը գլուխը դուրս է հանում, լեզուն ցոյց տալիս, մի քանի կաթիլ թոյն թափում ու նորից ներս մտնում: Ժանգոտած կըղպանքը փակում է: Մարդը մեքենաբար ապրում է իր օրը, եւ լուռ ներս մտնում խուցը՝ կեղտոտութեան, աղբի, թշուառութեան եւ ձանձրոյթի գիրկը ընկնում:

Տաղտկալի կեանք: Մինակութիւն, տրամութիւն:

Վարի, պառաւ կնոջ գաւակը, ինչ որ առեւտուրով է գրադուած: Առաւօտ կանուխ դընում է շուկայ, ուր քաղաքի չորս կողմից հաւաքում են անորոշ գործի մարդիկ, աւելի շուտ անգործ մարդիկ: Նրանք որ ապրուստի ոչ մի միջոց չունին, փող չունին եւ տուն կերակուր պիտի բերեն: Մէկը Չանգուից ծածուկ երկու ձուկ է որսում եւ բերում, միւսը՝ չգիտես որտեղից տարօրինակ խոտեր է ժողովում, մի ուրիշը տուներից կտրուած աթոռ, մաշուած հայելի, դամբը, կղպանք...

Սպասում են գիւղացիներին:

Կարագի եւ մածունի շուրջը անօթի դայի նման պատում են, հոտոտում, հեռուից, զգուշօրէն ակնարկութիւններ նետում, առաջարկութիւններ անում: Վանեցի սպեկիւլանտների ականջին բաներ են փախում, դէս դէն են վաղում, պոռում կանչում են եւ չգիտես ինչ-